



皇明開國功臣錄卷二十九

定遠黃金

霍輝 武慰 楊廣 馮貴 謝真 趙旺

高子圭 劉聚 王道童 王成 周成 李覺成

何應龍 陳壽 耿瑞 賈成 魏實 孫斌

朱原 李清 杜榮 歐智大 孟良 林遇春

徐榮 關敏

霍輝濠之定遠人姿貌英偉膽雄萬夫擊劒舞槊技
絕倫輩歲甲午橫山歸附克張家堡驢牌滁州三汜
河等砦乙未正月克砦曰新河曰版門皆于和州元

兵攻和州從擊敗之以功授百戶六月扈蹕渡江
取采石太平

上駐守太平元將蠻子海牙結砦江面陳也先般巷集
師並欲寇城而也先先犯上命諸將禦賊輝從力
戰禽也先丙申春蠻子砦破縛陳兆先於方山乘勝
克金陵東下鎮江元登進總管秋圍常州翦張士德
兵取橫林樂社丁酉三月常平攻寧國縣敗宣州援
兵遂并有宣州六月下江陰伐無錫捷于甘露戊戌
三月攻湖州月城安慶為長江上流要衝趙普勝守
城頗艱規取己亥夏輝從諸將擣之俘數十人尋拔

小羅家砦庚子龍江拒陳友諒戰勝復太平辛丑從
上親征江州友諒奔鄂因下洪都癸卯三月張士誠遣
呂珍將兵寇安豐上帥師援之輝從控珍前鋒追
奔數十里回攻廬州三閱月友諒圍洪都報至復從
上親征麇戰鄱湖敵兵劔移舟欲逋隨擊之于禁江口
友諒敗死其子理奔鄂自立從攻之甲辰二月殲其
將張瑄為大軍應城中震恐理降鄂平退取廬州復
援安豐乙巳迫通州克海安泰州時宮制行除鷹揚
衛管軍百戶丙午調虎賁衛陞羽林左衛正千戶下
楚州薄浙西剡昇山砦降舊館湖州皆從徐大將進

兵丁未九月從滅吳賜彩段表東討中原沂州益都
濟州洪武改元二月克博平三月克大梁四月取河
南路賜誥授武德將軍調羽林右衛取河北燕冀所
向摧堅破逆綽有茂功陞僉貴州衛指揮事階宣武
將軍誥與世襲仍討中原鳳翔秦隴鞏昌臨洮平涼
慶陽皆下三年八月與諸將征虜分道進取猝與虜
兵遇千騎奄至部下咸為動輝怒下令曰今日之事
何事敢有退縮者斬遂率眾奮擊中創沒于陣事聞
朝廷惜之命附祭功臣廟子英八年四月取充散騎舍
人六月襲指揮僉事調豹韜衛孫遠十七年襲調合
州衛二十二年調貴州平越衛夫人臣委質以事君
所自立者有大節焉忠義是已忠義也者本於天而
具於性人皆有之然而克全之者往往見于剛腸之
士惟其見道分明義重嵩岱死輕鴻毛知有君國不
知有身家也然身可殺名不可死故死義者流芳彼
孱懦忍澆偷生自私負國背君以自遺臭者忠義之
賊也如輝者敵王所懷勇往無前捐軀徇節豈不偉
然烈丈夫哉輝雖死而忠義之名耿耿天地間猶嚴
霜赫日使人畏而仰之則其不死者固在也真可為
世教勸矣是故吳輝傳實之卷首併列沒於王事及

死古子變忠義可稱者二十五人于左方

武慰定遠人壬辰之亂鄉民多散亡慰從父質樹柵
橫山為保聚計癸巳

太祖延攬材武士攝義兵慰疏附試其趨勇長先鋒克
張家堡五河大柳滁陽和州上橋青山寇兵扈蹕渡
江拔采石太平溧水溧陽中丞也先二砦所向金陵
鎮江廣德毗陵宣城江陰甘露望亭勁兵堅壘立取
而破屢賜銀枕其攻湖州下金華奪諸暨援秋浦龍
灣皆隨諸將從 上討皖城直擣潯陽策應安豐廬
彭蠡擊武昌廬州江陵海陵淮陰自有茂功歷副都

先鋒管軍百戶正千戶賜誥階武德將軍攻舊館傳
朱暹兵九十餘人合戰吳門禽張士誠以出賜彩段
四表東北征琅邪益都博平浚儀洛陽衛輝河西務
通州克元都陞大興右衛指揮僉事進宣武將軍守
北平調征山西從取大寧開平應昌全寧虹螺等處
追捕蠻子太尉丞相驢兒平章沙不丁等軍獲人口
馬駝以千數賜鈔幣與世襲洪武五年從大將軍征
沙漠陣亡贈指揮同知附祭功臣廟子經襲指揮僉
事調虎賁左衛十八年卒孫德襲調留守右衛二十
年調蘇州衛二十三年坐譴行伍隸普定衛奮從征

進累策戰勲二十五年復永寧衛指揮僉事宣德初卒無嗣弟雄襲雄子勛慰曾孫也天順元年襲

楊廣廬州巢縣人初事雙刀趙為元帥以智勇聞歲

丁酉四月宣州歸附授左翼元帥副使十一月從總

兵徐達攻池州樅陽窘雙刀趙俘其兵戊戌十月克

復宜興先是宜興復叛上命達率師討之未下至

是達遣兵絕其餉道帥廣等併力攻城遂拔之十二

月從下婺州己亥正月克諸暨攻紹興還婺九月取

衢州庚子正月攻高郵月城先登辛丑四月策應濠

州八月江州既破陳友諒走武昌壬寅正月遂下洪

都留守禦癸卯六月攻吉安甲辰武昌平從討熊天

瑞於贛州乙巳正月天瑞降南雄韶州亦附丙午征

進湖南益陽三月陞英武衛管軍千戶八月諸將伐

張士誠廣乘海舟取湖州十一月合圍蘇州明年九

月城破士誠就禽論功賜彩段超遷鷹揚衛指揮使

十一月取沂州益都十二月東伐萊陽洪武元年正

月克之四月克河南路擣潼關六月賜誥階昭勇將

軍渡河與偽官楊呂二平章大戰賊眾奔潰獲馬數

十是冬攻漢中二年三月克鹿臺鳳翔四月克鞏昌

守禦十月畧西蕃援臨洮渡河擊番寇敗去未幾奉

旨開設鞏昌衛三年授世襲誥仍昭勇將軍四月襲
王保保軍於定西破之夷其營落五月征鐵石岷州
回衛九月復奉旨統領官軍開設秦州衛四年四
月隨穎川侯傅友德克蜀階州文州援漢中進克成
都拔崇慶承曹國公李文忠劄開設永寧衛守禦八
年九月詔領兵馬赴京調驍騎左衛九年正月隨徐
太傅征北營于薊州五月師還十年改河州左衛指
揮使誥進昭武將軍設衛守禦十二年率所部隨西
平侯沐英征洮州十八族蕃賊三副使穎騰子等禽
斬甚衆復於故城遇賊與戰中矢傷左脇尋卒訃聞

上為之惻然勅有司歸其柩所過郡邑致祭賜葬于巢
之柘臯鄉凡費悉給於官命詞臣撰碑銘以昭勲節
祖遇春贈懷遠大將軍親軍指揮同知輕甲都尉追
封弘農郡侯父興旺追封弘農郡侯祖母李氏母柳
氏妻張氏俱封弘農郡夫人子潮初克參侍改散騎
舍人十二年征西有功襲興武衛指揮使十四年隨
徐大傅討松州旋師北平即從傅穎侯征雲南克普
定羅具砮盤江普安曲靖禽司徒平章達里麻攻烏
撒元右丞實卜合芒部土酋率衆逆戰擊敗之遂領
本衛官軍城烏撒克需益十五年二月刻雲南大佛

龍海等砦四月同馮張兩都督等應大軍于金沙江
及東川又從穎侯追東川寇至勝石上官渡楊柳江
八月大破阿吉魯等山砦追實卜十二月後大理克
佛元砦十六年討古州龍里洞砦又明年從宋國公
北平操練二十一年卒孫海襲本衛指揮使永樂初
調建陽衛征交趾紅州等處有功孫輔曾孫清玄孫
雲雲子光世襲建陽衛指揮使光子表
馮貴滁之來安人元季喪亂王師入滁
自是征取江南屢立戰功擢萬戶從參政
來附渡江克太平金陵京口以驍勇命為
自是征取江南屢立戰功擢萬戶從參政

日其邑

甲先鋒

守

昌征吉安歿于軍時其子福幼其兄春借職為百戶
進取江西諸砦遂守襄陽洪武四年春征劉應保等
砦有功授勅賜白金彩段七年朝京師龍虎衛千
戶十年六月以疾卒時福已長成與春之子興俱詣
司馬奉命各以父功皆得襲官福襲廣東肇慶衛
指揮僉事贈貴明威將軍如其職興襲鳳陽留守左
衛千戶福之子政亦為指揮僉事調沁州衛後卒無
嗣興二十八年以資序深召赴京陞高郵衛指揮僉
事詰授世襲居高郵八年世孫州衛指揮使永樂十
四年以捕倭航海歿其子鎮襲指揮使漕運有功薦

陞江西都指揮僉事鎮弟鑑襲政之職仍任洮州
謝直鳳陽縣太平鄉人少魁梧有膂力三辰之變歸
太祖為義兵隨諸將略地直前效勇攻九灣取定遠從
擊大橫山若得兵數多進克滁州再捷和州授百戶
扈 蹕渡江拔采石太平溧水破蠻子海牙舟師敗
陳也先於殷巷克金陵鎮江以屢功陞總管攻下毗
陵宣城江陰征同安勲績益著庚子夏戰龍灣陣亡
上憐其忠錄其子瑛為參侍舍人洪武元年授龍江衛
指揮僉事亦能自立軍功十五年調府軍後衛賜誥
命與世襲

趙旺濠梁土民也英勇有大志元季兵亂從人入軍
久無成功歲丁酉

太祖宅金陵旺拔身來附從征江南所向克捷王師攻
滅楚漢轉戰淮東并一吳會皆預有茂績歷總管千
戶陞僉興武衛指揮事取齊魯汴洛燕晉秦隴北極
沙漠效勞有加賜誥命與世襲洪武辛酉征雲南克
普定盤江普安皆先登進攻曲靖渡白水江與梁王
兵大戰遇坎馬蹶敵攢槊赴之中創沒事聞時祭功
臣廟旺有膂力善舞長刀每臨陣躍馬大呼殺入勁
兵強將皆辟易又惠愛士卒事上忠謹有功而能讓

其死也總帥以下咸痛惜之子二人長瑤襲指揮僉
事調瀋陽中護衛洪武末改西安左護衛次能襲兄
職孫一人昇正統初襲調懷慶衛指揮僉事

高子玉國初從越公胡大海取江南常宣徽睦等州
歷有戰功戊戌冬十二月從上取婺州己亥攻下
諸暨遂平處州七邑辛丑夏五月上以婺為浙東
大藩以大海為江南行省叅知政事屯鎮其地以王
愷為郎中子玉為總管同守之壬寅春二月癸未金
華苗軍元帥蔣英劉雲公等叛殺大海及愷併殺子玉
時有行省掾史章誠袖以執英脅降之不屈亦死之

劉聚濠州定遠人上世以來業農居藍柵村聚生有
勇力志意卓偉歲甲午寇兵侵擾遂棄生產仗戈歸
太祖從征伐克藕塘滁州和州版門砦渡江取采石太
平溧陽句容掖中丞也先水陸二砦定金陵鎮江累
功授總管下毗陵宣城江陰甘露堂亭車婺州破堅
壘於皖城廬勅兵於彭蠡以圍武昌以略廬州以擣
江陵在在克捷編任制行陞管軍百戶取海安游擊
通州奪昇山舊館歲丁未攻蘇州戰死事聞錄其子
海為興化衛百戶調寧川衛洪武十九年陞成都左
衛千戶卒孫全永樂元年襲有戰功曾孫隆玄孫昭

世襲前職昭調至慶衛

王道童國初有功仕為慶州知府時院判耿再成以

上命統兵鎮慶州元帥朱文綱同戊馬歲壬寅二月九

日乙酉慶州苗軍元帥賈仁德平祐之作亂先是金

華苗將蔣英等謀叛以書通賀李約以是月七日癸

未同舉兵至是加其李叛殺再成及文綱事各見前本傳併執

道童欲降之不屈亦遇害上瓦梁從常遇春為

王成定遠鳳停鄉人歲甲午於成與俱以攻青山等

軍乙未上駐和州遇春來附深陽征句容拔蠻子

若即有奇功渡江取采石太平

海牙水砦驍勇益著遇春言于上命為千戶破陳

也先管克金陵鎮江丹陽皆先登歲丁酉攻常州戰

死遺一子小乙甫三歲陳總管收而育之及長智力

過人洪武三年從龍江衛梁指揮操練後征雲南大

理等處獲馬數多十七年擢本衛旗總十八年征五

開石州勲績尤茂二十四年授山西汾州守禦千戶

所世襲百戶孫貴永樂初襲前職曾孫仲皓正統十

年襲

周成定遠人超勇善騎射歲甲午東城歸附克繆家

營鐵佛岡砦藕塘三汊河口全椒和州廩明諸砦扈

蹕渡江取米石太平攻蕪湖拔蠻子海牙洪江水柵
縛陳兆先定金陵鎮江廣德襲殺偽吳張士誠水兵
攻下毗陵復宣城以屢功授龍驤衛百戶授龍江大
破同安策應浙東益樹奇績丙午秋從大將李文忠
規取杭州克桐廬新城富陽進攻餘杭戰死子旺洪
武十年襲金吾左衛百戶十四年調留守左衛尋改
留守右衛從穎川侯征雲南克普定曲靖等處遂擊
大理中劄卒於軍孫方時年尚幼十七年四月一日
朝廷以其祖父皆死事特命為鳳陽右衛千戶二十六
年陞臨安衛指揮參將三十年坐謫廣西廬遠衛池
河守禦千戶數勦蠻寇有功永樂二十年卒次孫禮
襲千戶

李覺成滁州清流人父萬一善治生產家大殷裕歲
豐所獲填委場陌貧兒寡婦任其拾取鄉人呼為李
居士覺成生而武勇磊落有大志元季江淮大亂豪
傑之士乘時奮起歲乙未

太祖駐義和州覺成率其子寶歸馬父子在兵間同心
戮力屢著勞效渡江拔米石姑孰連破敵砦取金陵
鎮江克桐汭攻下晉陵皆預有功從開平王常遇春
征武昌取廬州援安豐定安陸襄陽諸郡丙午覺成

隨討浙西敗張士誠兵於舊館丁未進攻姑蘇以歿
上惜之勅有司歸其柩權厝京城南聚寶山實征中原
懋戰功洪武八年由千戶陞僉虎賁左衛親軍指揮
使司事覺成贈宣威將軍駙騎左衛指揮妻王氏封
德人十二年三月實征西戰死贈奉國將軍護軍大
都督府僉事賜葬于鍾山草堂川之原乃命遷覺成
柩同葬焉寔之日 上親臨祭凡喪事所須皆官給
之仍命儒臣撰碑銘論其父子勲節列于天下傳之
後世於戲 朝廷於死事之臣卹典優備如此其亦
報功勸忠之大者哉

何應龍寧國南陵人幼涉獵經史膂力絕人元末起
義兵累以奇功授珠虎符為民兵萬戶歸附

本朝仍襲其官從徐達北定中原還留宿衛後征西卒
于途子執中蔭襲次子時中

陳壽國初以勇智事大將徐達執戈從征取江南諸
郡縣摧鋒破陣功居多歷官指揮僉事繼征中原齊
魯汴洛燕冀勲尤卓然洪武二年從克鳳翔隴州鞏
昌臨洮平涼等處六月甲戌大將率諸軍進取慶陽
遣壽將兵守原州諸軍攻慶陽張良臣出戰不利元
將三保保欲為良臣聲援遣部將韓札兒來攻原州

將以緩慶陽六月辛亥祀兄攻原州城陷壽死之
耿瑞鳳陽縣人父君美仲父君用歲壬辰淮西大亂
太祖舉義兵君美君用皆附瑞從在軍甫弱冠材勇絕
倫甲午拔城口張家營嘉山繆把頭若取滁州乙未
舉和州君美以病免瑞隨君用渡江取太平丙申二
月三月克米石中丞蠻子水砦及也先營繼取臺城
鎮江奪旗陷陣預有功四月君用攻宜興戰死六月
瑞與君用子炳文取廣德丁酉二月克長興置永興
翼以瑞為總管同炳文守禦張士誠屢以兵來寇皆
為我師所敗甲辰冬士誠丞相士信復擁兵來侵炳

文大破之禽其裨將宋元帥士信憤怒益兵圍城瑞
率衆出城力戰中流矢貫腦死葬長興錄其一子
費成定遠人歲甲午歸附克城口滁州和陽渡江拔
來石太平剽敵砦攻下臺城鎮江廣德晉陵宣城皆
預有功授安陽翼總管擣江州麇彭蠡平武昌捷廬
州勞績隨著乙巳與大軍戮力取襄陽海安泰州陞
管軍百戶隨滅偽吳討中原洪武四年從傅總兵取
階州蜀守將丁世真率衆來拒擊敗之階州破進攻
文州渡白龍江橋至五里關世真復擁兵迎戰成奮
勇赴之中飛矢傷頰死蜀平錄其子宗為留守左衛

太平門千戶正辛戶永樂元年陞錦衣衛指揮僉
事與世襲五年征雲南歿于軍孫政襲調廣西慶遠
衛宣德初與賊寇敵陣亡曾孫寬玄孫鎮鎮子敬世
慶遠衛指揮僉事

魏實濠州人編籍永豐鄉八都一圖至正辛丑從孫
僉院渡江征討累著戰勳丙午除武德衛百戶伐張
士誠克舊館湖州蘇州北取中原破山東郡縣攻河
南河北進拔燕晉洪武二年調征陝西功烈益茂陞
本衛千戶五年從大將征沙漠陣亡命其子敬襲父
官十八年謫戍雲南都司都勻衛從何都督征蠻有

功二十五年還職孫海襲千戶調興隆衛左所

孫斌鳳陽縣人丁未年春歸附從攻姑蘇滅吳征中

原破沂州益都濟南洪武元年取東昌棗州大梁河

南陝州河北衛輝廣平河西務通州進拔元都下保

定克山西太原洪武二年除武德衛百戶討平鳳翔

秦隴鞏昌臨洮平涼慶陽三年有定西之捷五年從

大將征沙漠陣亡時其子寧方在襁褓優給之十二

年以其弟珍為百戶調衛寧夏二十年寧長成命襲

父職仍寧夏衛

朱原臨淮人丙午歸附隸徐丞相麾下從征浙西

克昇山峇峯無湖州攻破蘇州取中原齊魯汴洛燕
晉秦隴皆預有功授豹韜衛百戶洪武五年征沙漠
與胡兵戰死子亮十六年襲龍驤衛百戶

李清定遠人歲丙申渡江歸附從定江左江南江右
湖廣淮東浙西積有戰勲授管軍百戶進討中原破
魯郡克汴梁河南河北彰德廣平長蘆通州拔元都
取太原鹿臺鳳翔隴州鞏昌慶陽勞績尤著洪武三
年陞綏德衛正千戶十二年征西與虜寇大戰於洮
州身被鎗創裹創復戰既而中矢貫額遂死事聞錄
其子恭為南京虎賁左衛千戶十四年征雲南攻大

理戰沒無嗣姪景襲台州衛千戶調平越衛景子衛
襲平越衛千戶夫將臣之敵愾也當兩軍將合衆寡
不倫勝敗難必所貴直前無怯勝則勝死則死耳如
清者鋒鏑之下碎首弗避其子亦嚴氣正性徇義委
生皆丈夫之雄也一門二忠三載兩見豈非世之所
難能者哉使當時見危或亡命自奔或甘心降虜身
雖瓦全名則穢全奚足取耶惟父子同心而一節此
其所以難也表忠義作李清傳

杜榮定遠鳳停鄉人父旺有勇力歲甲午城口歸附
從克滁和渡一按江左諸郡縣進取江南屢立戰績

由先鋒為翼。洪武十一年十月殺賊有功陞龍虎衛前所管軍百戶。十三年疏陳征傷不能泣事。榮襲其職。初旺之從征也。榮隨在軍。凡立功多由父子戮力。至是榮以功能被委任。十四年命往寧波定海造海舟。十七年調遼東鐵嶺衛守禦。與世襲後征虜陣亡。子福永樂元年襲百戶。孫斌十五年襲。

歐智大定遠人。歲甲午橫山歸附。由塔山進取滁州。乙未取和州。扈蹕渡江取采石太平溧陽。擣蠻子。

海牙水砦剗也。先營克臺城鎮江。相汭皆有功。授總管。丁酉二月攻長興。拔之。留守禦數以破賊功。陞長。

興衛鎮撫。乙巳春張士誠遣兵數萬來寇。智大率眾擊之。中創沒于陣。子德時尚幼。命其弟智全為百戶。德既長襲父職。調長淮衛。洪武十八年調陝西西寧衛。二十七年調戍海南南山千戶所。二十八年改廉州衛。三十五年復職西寧衛鎮撫。永樂元年調寧夏中衛。孫寧襲。調建昌前衛。曾孫昇宣德四年襲建昌前衛鎮撫。

孟良濠州人。編籍太平鄉一圖。歲壬辰歸附。隸孫元帥麾下。以驍勇充先鋒。從克定遠五河。滁州和陽。渡江。拔采石。太平臺城鎮江。丹陽。授總管。進取江南。攻。

浙東轉戰龍濟破九江黃梅癸卯援安豐大敗張士誠兵陞水軍前衛管軍百戶征陳友諒于鄱陽力戰而死命其子孫世襲

林遇春定遠人至正乙未和州歸附渡江從取太平溧陽破中丞水砦克金陵鎮江毗陵宣城江陰下婺州擣同安潯陽征湖廣拔廬州泰州積功授水軍左衛百戶從討中原預有勞效洪武十八年隨平涼侯征廣南等處戰死子貴甫一歲在衛不能襲三十五生貴長成侍祖母劉氏陳情乞終養永樂元年正月恩賜還鄉永蠲征役

徐榮鳳陽縣人父麟沉毅好竒謀善野戰元季喪亂拔為民兵長歲丙申渡江歸附隸張僉院麾下從征江南諸郡縣積有戰功洪武元年授長淮衛百戶討中原勲勞益著老病謝事榮襲職英勇有父風累樹偉績十四年征雲南克普定普安等處進攻曲靖戰死無子錄其弟華為千戶十八年擢僉德州衛指揮事華子福襲陞州左屯衛指揮同知關敏廣州南海人國初王師下嶺南全城歸附授巡檢後為餘寇攻陷死舉家二十口皆被害事聞贈兵馬副指揮命立廟歲祭

皇明開國功臣錄卷三十

定遠黃金

劉先 韓温 楊仲名 李勝 聶偉 許得

鄧祥 陳某 王子明 徐理 趙圭 尹堅

王執 陸旺 唐賀 忤兼 繆宣 胡保舍

賴鎮 吳廣 呂琛 宋炳 喬榮 李榮

劉原 李惠 秦旺 唐光 程信 史鑑

謝德清 周閔 王暹 王廷 葉山 梁得

繆美 蘇銓 李鑑 孫敬 于海 鄧義

鄭選 高博 韓讓 丁忠 武德 黃敏

姜豫

胡閏

夏毅

倪旺

趙彬

劉文

裴誠

譚濟

劉傑

陶良

劉光字光祖開封密縣人自少負大志有膽略既長忠義慷慨才識過人適元末海內鼎沸即募民兵以圖匡濟義旗所向罔不克捷以功累陞平章政事鄜國公既而元亡先知天命有在洪武初率所部來歸從鄂國常公信國湯公收河北諸郡洎西戡晉絳敗王保保兵復從丞相魏國徐公克陝西秦鳳環慶諸州歲己酉由平涼入覲承恩授驍騎前衛指揮僉事明年復從征迤北調驍騎左衛甲寅調茶陵衛加授

廣威將軍辛酉調征雲南所至身先士卒大小五十餘戰俘獲斬馘甚衆雲南平置烏撒衛指揮使司陞先為指揮同知以鎮之時治所新設蒞事精勤撫治有方蠻獠信服未幾賜誥進階懷遠將軍并得推恩贈父證如其職母范氏配王氏俱為淑人戊辰八月乙巳以疾卒年六十三子二人長廣襲職克繼先緒屢立戰功積官至驃騎將軍右軍都督府都督僉事總戎甘肅領符節佩平羌將軍印控制西北諸番大著威靈賜誥贈先如廣職次德孫七人傑偃信佑偉倣儼夫惟元運既終中外跋扈之臣外託興復內懷

僭叛因而紛擾者不可勝數其中能知幾識變歸順
真主以共成事功者幾何人哉若先乘時自奮既弗
克遂其匡濟之志乃能識達天命際會風雲樹功業
於生前福子孫於身後可不謂之豪傑之士乎

韓溫以指揮僉事守蘭州洪武三年元將王保保自
甘肅來攻城凡四閱月溫設方略固守屢乘其怠敗

之

國志

一考韓溫即張溫

楊仲名國初從征伐累立戰功任辰州衛指揮苗蠻
為亂上命仲名聲罪致討久之勅諭之曰兵以恤
民為重伐暴當先三苗不遵教化朕命爾率兵討之

但知兵行日期其所到地方至今未審何處特差內
臣吳誠詣軍前觀兵說話爾其遵守施行的當消息
令人來報未幾捷至諭之曰三苗種類不仁自古帝
王多撫而不能遵化以致累世為良民害今年朕特
遣爾仲名率兵進討果有韜略十一月一日飛捷至
京不覺朕心歡悅是命內臣尚履奉諭呂王親詣軍
前觀兵閱勝爾其用心以制人勿怠吉哉既而復諭
之曰三苗無道負險重山既不同於人事甚不率於
天時屢起盜心久為民患今命爾仲名為總兵官率
辰沅等處官軍及土著隘丁兵夫人等相機進取以

消民艱爾其深制人之翰以稱朕意其辰沅等處聽
調官軍悉遵節制違者以軍律施行

李勝淮安山陽人剛勇有謀善攻戰國初從征江南
平蘇湖以功歷陞指揮僉事繼破山東取汴梁克河
南府勲烈益著洪武元年十一月置潁州衛命勝帥
兵守之潁州元季拜咬兒作亂民多逃亡城野空虛
是年夏五月上自如汴道過其地親見之至是命
勝築城立衛招撫流亡民始復業三年陞燕山衛指
揮同知洪武中卒勝有膂力尚氣節秉忠負義為時
名將子銘襲從靖難陞授盧龍衛指揮使孫端以才

略薦承召入涖親軍未幾遠理衛事廉介有為馭兵
撫民咸敷恩澤遇邊鄙有警悉心籌畫奮勇前驅不
以死生禍福二其心勉效忠義克繩祖武云

聶偉國初從征戰累立奇功歷官指揮洪武十年河
州西南土番有川藏者作亂其酋甚桀黠偉從總兵
沐英討之炎月渡黃河略川藏其酋懼而遠遁俘虜
人馬牛羊數多十一年從討平延安伯顏帖木兒征
降朵干萬戶乞失迦夷其部落是秋洮州十八族番
首三副使汪舒穎孛子烏都兒及阿卜商等叛據納
鄰七站之地復從英移師討之十二年二月兵至洮

州故城三副使阿南阿汪順朶羅只等率衆遁去我師追擊之獲磧石州叛逃土官阿昌七站土官失納等斬之遂於東籠山南相度地勢築城戍守遣吏報捷且請城守事宜上曰洮州西番門戶今築城戍之是扼其咽喉矣遂命置洮州衛以律領兵守之同守者指揮陳暉楊林孫禎李聚丁能

許得濠之定遠人勇毅負奇志當元季兵亂仗劍從太祖平定江左進取江南及從大將東征西討大小數百戰率挺身前赴奪旗陷陣功居多中原既平論功行賞陞授指揮僉事後累功進都指揮僉事宏略老

練為時所推重洪武末卒子亨字士通襲燕山右護衛指揮僉事調開平調廣武從靖難拜都指揮僉事命守和州改涖北平受命董治長陵有功進都指揮同知調掌金吾右衛再遷都指揮使出鎮浙江平海寇給運餉繕城郭堅利甲兵訓練軍士大著聲望拜右軍都督僉事卒賜葬祭孫六人長壽襲杭州右衛指揮使次霖次復次富次貴次端曾孫安玄孫鏗世襲前職

鄭祥廬州合肥人少有大志勇略絕倫國初從王師戡定四方以功歷官指揮僉事洪武十四年從征南

克普定普安曲靖善闡十五年克大理擒段世尋攻
下諸蠻部勲績赫然十七年陞大理衛指揮使命以
斧鉞鎮其地時邊境初附夷志反側乃繕治甲兵訓
練士卒明肅號令極撫循綏定之勞大理舊城毀廢
因指揮周能所築新城闢而廣之垣墉堅固樓櫓壯
麗過者改觀及城龍首上關龍尾下關各壯固可歷
久遠又廣屯田新教化脩祀典是時西平侯沐英總
鎮雲南遇有征伐率以命祥多見克捷二十年春浪
穹逋寇扇群蠻為亂鶴慶劍川輒相為應祥率兵乘
其未集掩而殲之諸蠻齟齬服在鎮十餘年善馭下人
恩威兼濟軍民懷之

陳其真州人元季兵亂淮揚雲擾有志匡濟歲乙未
太祖渡江從諸將來歸東征西伐以材勇自奮著攻城
畧地之績天下大定論功行賞遂託以心膂之寄拜
中京留守衛指揮使大懋聲實為國勲臣子某以有
父風閑於弓馬又習知文史從父勦凡未附者亦以
功擢長一旅之衆天兵平雲南以所部從大將軍調
度還奏捷于朝因留備宿衛洪武十八年浙江叅政
闕員上以武臣直亮可任於是拔自武弁拜三品
文階以行聰明特達論議設施與僚友和衷相濟政

令為之一新人稱為文武才云

王子明國初從征伐平定江左累立戰勲歲丁酉六月從鎮撫吳良取江陰由秦望山進兵克其城未幾上以江陰當東南極邊去姑蘇百八十里密邇偽吳烽火相望寔要害地也以良為院判帥兵守之命子明為元帥同戍焉時偽吳兵彊國富寔一勅敵戊戌秋敵兵來侵良率子明出兵擊之俘其人獲弓弩甲仗以千數明年春寇復犯境蒙衝蔽江偽將蘇同僉建牙君山指畫為進攻狀有頃陣于江壩良既命將禦之敵分兵攻東門子明乃馳出一鼓而進生禽其偽

帥陶某以下百五十人盡溺死者甚眾敵大敗宵遁十月復襲敵於無錫之三山狼狽奪氣倉黃旋軍自是震懾不敢復犯在戊十年晝則被甲夜則枕戈警備日甚一日練兵足食禁惰防姦使敵無隙可伺桴鼓不鳴軍民按堵故論守江陰良之功為太子明預有力焉

徐理汝寧西平人國初從諸將征伐有功積官營州中屯衛指揮僉事

趙圭國初從征伐有戰功洪武中為福建都指揮使剛直忠厚訓練士卒號令嚴明能以恩惠兼濟在任

十年鎮之以靜軍民咸賴之

尹堅字潮春江西永新人脩幹多力元末兵亂從熊天瑞據贛州為兵馬指揮

太祖皇帝遣開平常忠武王下江西至贛州攻之潮春乘城飛鉅石傷忠武頰翌日天瑞以城降潮春匿不敢見將自殺忠武聞之召慰曰好男子當如是留置幕下還朝言于上命武士四輩與角力皆不及以潮春為直殿將軍外國貢天馬名撞倒山奚官近之輒人立莫能鞞上以命潮春潮春立高樓上使人引馬過其下提沙囊四百斤壓之乃得施鞍勒從大

兵攻燕京執長刀突陣兩手生擒元金虎符兩將銜刀於口而馳元兵辟易莫敢近以功累官至武德將軍祥符衛鎮撫誥詞云克襄陽於上流拔秦郵之重地及淮陽戡靖協取吳興洎討姑蘇復從北伐定山東之州郡恢汴洛之封疆潼華咸歸功勤斯著其歷履可見矣

王執國初以勇智預征南北懋建武功歷官指揮僉事授世襲洪武十四年從討雲南克普定普安益江曲靖善闡十五年克大理臨安及攻下諸蠻部勲勞有加十七年雲南平陞臨安衛指揮使領節鉞鎮其

地執以蠻夷初附脩城堡完械器嚴號令信賞罰練
兵撫民大著聲望總鎮西平侯征勦蠻寇屢以命執
二十三年秋九月教化三部不供租賦執率本衛兵
討而殲之在鎮數年恩威並施遠近悅服安邊化俗
與鄭祥賴振胡淵袁義並以良將稱

陸旺鳳陽縣太平鄉人歲甲午歸附勇力絕倫戰輒
有功授前部先鋒和州既拔扈蹕渡江取采石太平
中丞水砦南臺南徐晉陵宣城江州豫章鄂渚泰郵
湖蘇歷陞管軍正千戶隨破齊魯并其關隴鞏慶勳
績尤懋洪武三年擢鳳陽衛世襲指揮僉事賜誥命

隋明威將軍十九年卒子成襲

唐賀廬州巢縣人性勇毅才識卓犖當元季兵亂挺
身從軍久無成績歲庚子龍江歸附從王師取安慶
拔江州援浙東殲漢滅吳南征北伐積有戰功授豹
韜衛管軍百戶陞興化衛副千戶洪武三年擢湖州
衛指揮僉事階明威將軍誥與世襲子長斌坐累謫
戍次鑑襲指揮僉事調睢陽衛英幹有父風孫裕袒
以嫡長襲僉睢陽衛指揮事

件秉國初從征江南累策戰勳授千戶歲丁未九月
攻破蘇州執張士誠師還論功賜綵段表裏誥授武

德將軍十月從取中原克沂州益都等處十二月從都督同知張興祖攻東平元平章馬德棄城遁興祖遣秉與指揮常守道追至東阿元參政陳璧以所部五萬餘人降遂取兗以東州縣尋克濟寧明年戊申從興祖北上克長蘆直沽河西務通州進拔元都皆預有功

繆宣定遠鳳停鄉人歲甲午城口歸附從何平章取滁和渡江克采石太平溧陽水陸二敵砦南臺鎮江隨大將下毗陵宣州馬馱沙授羽林衛前所百戶鏖楚漢擊淮東滅吳會北伐中原累功進千戶洪武中

征拔普定普安曲靖善闡大理鶴慶擢蘭州衛指揮僉事階明威將軍誥與世襲十九年迤北破虜陞湖廣都司都指揮僉事子賢襲長沙護衛指揮同知胡保舍虹縣人國初從取江南歲戊戌十二月扈從太祖親征婺州圍其城處州參政石抹宜孫遣元帥胡深以獅子頭作前陣來戰上命保舍領馬步軍迎之一戰而禽前鋒元帥李眉長胡深敗走後二日遂

克婺州

賴鎮國初從征伐有戰勲授指揮僉事洪武十五年討雲南以功陞大理衛指揮同知調景東衛歷著威

望二十年調洱海衛創置公署增廣屯堡其守備之
能訓練之方與表義齊名上下同稱之卒于官子溶
東甌王壻也襲職領兵馬

吳廣洪武初為温州衛指揮僉事時南溪人嘯聚為
寇廣討平之誅其首三人餘悉遣還鄉里廣嘗受學
於余闕故其在衛尤尚儒術

呂琛國初以軍功授鎮撫歲丁未冬十月從平章楊
璟征廣西洪武元年春正月進兵攻永州元守將右
丞鄧祖勝拒敵戰却之獲其人馬祖勝收兵入城固
守璟命琛等圍之未幾元兵自廣西來援駐東鄉倚

湘水列七營軍勢甚盛璟遣琛率兵擊之元兵大敗
獲其萬戶丁武等一千二百三十九人馬一百餘疋
夏四月克永州繼取耒陽進拔靖江皆預有功

宋炳國初以軍功任千戶守禦饒州歲乙巳冬十月
癸丑信州盜蕭明率兵攻圍饒州時陶安為知府炳
與安率吏民分城拒守選勇卒為游兵晝夜巡捍而
請救於江西行省賊眾欲攻城炳等射之矢下如雨
賊不敢逼越三日行省援兵至遂大敗之蕭明遁去
擒偽招討都海萬戶常勝斬之饒州遂安

喬榮濠州廣德鄉人歲丙申歸附從取金陵鎮江丹

陽以功授總管攻毗陵宣城援龍江破安慶拔江州
下豫章大戰彭蠡累立奇勲癸卯秋除武德衛百戶
繼征武昌克廬州淮東浙西以次戡定進討中原勞
績有加洪武四年陞本衛千戶十一年擢遼東左衛
指揮僉事賜世襲誥授明威將軍洪武末卒子昱襲
尋卒姪文襲調鳳陽留守中衛姪孫鑑襲正統十四
年失陷天順三年姪曾孫善襲

李榮臨淮人國初從克滌和定江左征進江南滅強
漢殪偽吳北伐中原皆有勞績由旗總授永平衛千
戶陞廣武衛指揮僉事洪武五年正月庚午命將征

王保保榮從李文忠由東路出居庸擣應昌二月戊
申取和林渡廬駒河兼程而進深入土刺督兵與阿
虜將蠻子哈刺章戰數合追至阿虜渾河兵益衆文
忠馬中流矢下馬持短兵接戰榮即以所乘馬授文
忠文忠得馬氣益厲遂一戰敗敵俘獲以萬計是役
也榮翼衛之功居多六年復從北征有功

劉原定遠人至正甲午結砮大橫山湯萬戶來攻原
降附焉從取滁州乙未取和陽渡江取太平溧陽溧
水破采石方山二敵砮克金陵鎮江毗陵宣城下江
西武昌金斗泰郵湖蘇北伐中原攻城野戰奮不顧

身摧鋒怯敵者屢矣由總管千戶陞指揮僉事洪武
中征河州西番川藏洮州三副使併勦諸番陞鎮番
衛指揮使賜誥命洪武末卒孫青襲指揮僉事

李惠國初從王師征伐以戰勲歷官福州衛指揮僉
事洪武十四年十一月安福縣民作亂惠率兵討之
賊聚衆八十餘人拒敵時福州右衛指揮張春以兵
來會賊懼遁入山谷適延安侯唐勝宗總兵征處州
平陽等處聞賊遁乃分遣兵士追捕獲賊衆二千五
百人其餘黨分散潛匿惠遣兵悉討平之

秦旺定遠人父文質驍勇善鬪歲甲午從湯萬戶營
于塔山進取滁州乙未取和州湯公薦其才授千戶
六月渡江取采石太平溧陽溧水丙申克中丞水寨
臺城鎮江金壇富莊丁酉下常州江陰等處領兵守
禦常州乙巳編伍制行授常州衛管軍百戶病金瘡
謝事旺襲職忠勇有父風大為湯公所信任丙午八
月從伐張士誠略太湖攻舊館降偽將呂左丞虜其
兵馬轉戰湖州守將張右丞降擊吳江州將不能禦
亦降遂圍蘇州軍閭門與張寇兵屢戰屢勝丁未九
月吳平論功賜綵段遂從湯公討方谷珍取福州拔
建寧益著勞效洪武六年隨徐太傅征北邊追王保

保有功八年擢虎賁右衛千戶十八年隨穎國公雲南勦平夷蠻陞台州衛指揮僉事誥授世襲二十年調松門衛二十三年從鳳翔侯開衛九溪以疾卒子完襲清浪衛指揮僉事陞同知永樂三年調安陸衛孫晟永樂十五年襲安陸衛指揮同知

唐光字大泉定遠人曾大父元不仕大父震父冕皆以光貴贈昭勇將軍指揮使元季天下兵爭光奮身起行伍從王師征討屢有功烈洪武三年授西安衛百戶以材能尋攝堅城衛千戶將所部征西番克洮州進取阿速石門關雪山等寨遂授堅城衛副千戶

某年從某公征瓊帽山遣虜深入沙漠而還繼從某侯征雲南克普定普安曲靖楚雄大理金齒永昌諸處進階武略將軍十七年論征南功陞濟州衛指揮僉事又從征捕魚兒海獲虜衆并輜重馬牛羊無筭及追降乃兒不花與有功復征塔灘寧夏進階明威將軍某年略地驢駒朶顏等處陞龍驤衛指揮使誥授昭勇將軍後征五開還以老疾致事洪武庚辰五月十六日卒年六十七配姜氏封淑人子四人長琮襲本衛指揮使陞江西都指揮使鎮方面有賢名次亨懷遠將軍某衛指揮同知次興次權孫四人純緒

綱紀曾孫三人賢良方惟光以武勇發身奮威敵愾
致通顯三十餘年辛勤始終功勞著矣又善馭下得
士卒心所以委社錫慶者不亦遠乎墓碑

程信國初從王師取江南累策戰勲繼征中原克沂
濟等州陞徐州衛鎮撫洪武戊申隨大將軍定樂安
大梁相州廣平長蘆直沽通州元都尋下保定雄州
諸處是年冬大將將取山西以雄州為要害命信統
兵守之明年以守禦功賜銀幣

史鑑鳳陽縣人歲甲辰附歷征有功授金吾衛管軍
正千戶賜誥階武德將軍洪武五年陞廣西桂林左
衛指揮僉事子富襲

謝德清濠州東湖村人歲壬辰兵亂奮從湯和攻取

泗州以功充萬戶甲午七月克滁州乙未閏正月克

和州五月擊板門裕溪鐵長官等砦六月朔渡江取

采石太平七月取溧水八月取溧陽丙申三月三日

破中丞水砦八日剗也先營十日拔南臺十七日舉

鎮江四月掇金壇丁酉三月八日下常州陞總管留

守禦六月并江陰明年張士誠兵寇常從守將戰却

之十月復來寇俘其人馬戰船賊勢為沮壬寅攻無

錫癸卯大敗士誠兵於錫山斬獲甚衆甲辰從援長

興十二月陞常州衛管軍正千戶賜誥命其文曰郡屬輔郊必嚴守戍士有武略可替兵麾謝德清超衆之英兼人之勇從濠梁之義旅收淮右之連城繼奮戈船飛踰天塹拔采石而定姑孰克溧水而取金潤佐建業之開基先攻敵砦擣南徐之堅壁克靖江壖拔要郡於毗陵俾邊疆為內地功既揚於屢勝秩宜總於一軍遂陞戎衛之官以固專城之守爾其和衷脩職馭兵撫民茂集勲勤上副嘉命可武德將軍常州衛管軍正千戶吳元年九月克蘇州十一月踣明州十二月二十八日福州亦下洪武元年正月禽陳

友定于延平二月奪興化平泉州五月討捕蘭秀二山海寇獲之二年以疾致事于庸十六年冬襲職調太原左護衛中所二十三年陞本衛指揮僉事

周閔定遠人歲壬辰充義兵入濠從事郭元帥繼隨太祖取滁和征進江南擊荆楚轉戰淮浙北伐中原積有勲烈洪武丙辰由千戶陞沂州衛指揮僉事誥授明威將軍癸亥謫南寧衛鎮撫丁卯調清浪衛子亮孫忠永樂正統間俱襲鎮撫

王暹臨淮人歲甲午從王師攻泗州克滁陽乙未取和州渡江取太平集慶南徐毘陵等處立功戰陣初

授總管進管軍百戶陞滁州衛指揮賜誥命子真洪
武中襲調鹽海衛

王廷國初以勇智從征伐累立戰勲歷官管軍正千
戶丁未秋九月始蘇既平 上命湖廣平章楊璟率
師征廣西廷從行洪武元年春正月進攻永州元守
將鄧祖勝迎戰廷隨張彬等擊破其衆祖勝收兵入
城廷隨圍之二月甲寅璟遣廷將兵取寶慶進次茱
萸灘賊衆千餘據險拒敵廷擊敗之追至城下周文
貴遁去餘衆猶據城拒守廷進兵逼之明日賊衆縱
火掠民財出走遂下其城留兵守之

葉山定遠昌義鄉人歲甲午橫山歸附從克滁和渡
江取姑孰集慶京口毘陵宣城江陰進擊楚漢攻偽
吳東征西討摧鋒破敵赫有偉勲歷陞太倉衛指揮
使賜誥命洪武末平孫榮永樂二十年襲調遼東廣
寧中衛曾孫麟宣德中襲

梁得鳳陽縣人壬辰之變充義兵從據濠以勇略事
太祖甚見親信隨取五河定遠滁州姑孰金陵鎮江常
州江右湖廣淮東浙西屢奏戰功洪武甲寅由千戶
陞龍江衛指揮僉事賜誥階明威將軍二十年卒子
二人長通襲職調普安衛無嗣次暹襲

繆美壽州安豐人歲壬辰江淮大亂集勇士捍鄉井
推陳也先為主帥乙未夏與陳也先渡江而南察陳
也先所為後必敗以丙申春三月率所部千餘人馬
三百餘疋自歸 上于陰巷從胡越公攻下建康出
北門追水砦軍乘勝克鎮江丹陽五月克廣德宜興
八月攻常州所過屯堡砦金澤楊思明皆降丁酉春
二月拔紅菱橋洛社諸砦三月克常州四月從攻寧
國會長鎗援寧國美與戰殺獲甚衆既下寧國復從
攻下徽州七月苗軍楊完者侵徽州出戰西門又出
北門戰又戰于東門連捷追北二十里戊戌春從襲

阿魯灰院判營破之進攻於潛昌化獲其縣印上之
三月從攻嚴州道遇長鎗戰却之進拔嚴州五月偽
吳張士誠與楊完者合軍犯嚴州敗其舟師東門追
至大浪灘而還又分兵出西門覆其精銳自是苗軍
勢衰矣八月壽昌急領其兵援之十月克蘭溪浦江
用降人蔣元帥為導取義烏遂會胡公金華城下
上至金華美從胡公大敗處州胡深元帥軍梅花門外
逐至交道盡獲其輜重金華遂降己亥正月分兵取
諸暨略地至紹興十月還次金華十一月復從胡公
擊處州處州軍據磐嶺其地險隘衆莫利先登美率

敢死士持挺魚貫奮擊奪其壁以入我師守將石抹
叅政棄城而遁分兵略定浮雲得元帥葉琛使諭元
帥胡深曰 今上天授也士之欲立功名者不以此
時自附將誰與戮力且去年爾之衆戰而大敗今年
我之師不戰而勝則天意亦可見矣與其阻險偷生
旦夕孰若改圖可以保富貴也深然之出降龍泉慶
元皆平遂以胡深葉琛暨劉基入見內出銀碗文綺
賜之而遣還金華庚子四月除胡公帳前萬戶閏五
月從擊信州偽漢陳友諒軍狼狽引去胡公遂師金
華留美從林都督守信州辛丑二月以其師取石港
五月張士誠軍犯諸暨胡公促美部兵東還禦之遇
於楓橋戰却之未幾陳友諒軍犯信州復以永嘉侯
檄往援行至草萍聞敵保玉山馳赴之戰于東津橋
以寡敵衆無不一當百敵懼而却遂復玉山永嘉侯
命為前鋒比達信州又命結營敵壘之後絕其歸路
城中聞援兵至開門夾攻友諒軍脫者無幾 上聞
之出銀碗一文綺三即賜之壬寅春胡公命引兵還
金華至常山聞胡公為蔣英所刺乃兼程進至金華
發喪張士誠軍乘胡公之喪攻諸暨急曹國李公遣
美以援請于守將曰夜斫其營其衆可亂而走也從

之呂副樞果棄輜重僅以身遁事 聞有御衣之賜
甲辰三月移守嚴州四月謝再興舉諸暨叛附張士
誠美從胡叅軍城新城敵撓我版築美統奇兵出敵
背決戰敵敗北而城以完遂留守焉乙巳三月張士
誠大舉圍新城號二十萬聲振浙東美初應之北門
之外覆斗巖之下敵攻西門又趣當之再戰再捷會
曹國公大敗之于龍潭美逐其餘黨至湖頭受上賞
丙午正月從王指揮援浦城拔無蓋洞船山寨遂敗
陳友定軍于船山大寨五戰而入浦城洪武元年春
從下建寧延平四月復從林都督殄海寇于昌國十
二月除武毅將軍管軍千戶明年春從曹國公北征
克景州薊州惠州戰錦川六月從攻上都復取道通
州往接大同戰黑河遂與大軍俱還北平三年二月
從華都督攻下雲州五月復從曹國公擊上都敗蠻
子太尉軍于察罕腦兒進攻應昌分兵擊花環寨曹
國公命護送江文清士馬至北平十月班師南還定
封行賞賜以世襲之命則四年二月也六年夏城中
都七年春移戍平陽平陽岸海而故城規制弗稱美
改作之在平陽八年年未六十輒致事
蘇銓以軍功洪武初任柳州衛指揮僉事謀略過人

首創公署操兵有法賊攻劫融縣銓率兵奮擊賊敗散後復聚衆剽掠銓設法擒之自此畏服不出民賴以安

李鑑鳳陽縣清老鄉人歲乙未歸附從征江南以驍勇累立戰勲甲辰授管軍百戶洪武元年克汴梁等處擢武德將軍河南衛前所正千戶十一年征西有功陞臨洮衛指揮僉事二十五年卒孫暹襲

孫敬定遠人甲午年附從取滁和姑孰集慶京口毘陵攻戰湖廣授宜陽衛百戶洪武四年進武岡千戶九年調道州衛十一年以戮蠻寇功陞廣西右衛指

揮僉事賜誥階明威將軍子勝襲調寶慶衛二十年陞調安陸衛指揮同知宣德六年調海南衛孫斌襲正統十四年陣亡無嗣斌弟英襲

于海洪武中柳州衛指揮僉事性氣雄勇守大藤峽洞蠻聚衆攻劫海率兵奮勇長驅殺賊潰散搜勦殆盡一方遂安

鄧義臨淮人壬寅年歸附從援安豐征陳友諒平武昌廬州江陵海陵吳興姑蘇北伐中原著攻城野戰之績由百戶進留守中衛千戶陞留守後衛指揮鄭選國初以功授武畧將軍守禦饒州相原隰度營

基即立規制曲盡材用於是隊伍整肅士卒效力洪武初邇寇唐丑人等作亂勢猖獗選擊平之民賴以安饒人立廟祀之

高博定遠人歲甲午從克滁州乙未渡江取姑孰南臺南徐毗陵江陰婺州戰楚漢淮東浙西授金吾左衛百戶征中原有功陞西安右衛千戶後從諸將積勲洪武丙子超遷福建都指揮僉事以疾卒子智永樂改元襲義勇前衛指揮同知調錦衣衛孫燾永樂二十二年襲調浙江金鄉衛指揮同知

韓讓鳳陽縣人至正甲午從取大柳版門等砦乙未取江左歷征江南每戰必備前驅摧堅破銳功居多洪武六年由百戶擢旗手衛千戶十一年征西陞僉懷慶衛指揮事誥授明威將軍十六年卒子禮孫聚世襲本衛指揮僉事

丁忠字廷節小字觀音保定遠人開國元勲贈都督追封濟國公德興子也德興歿上念其功時忠尚幼召見內廷上喜曰是兒有父風特賜優卹洪武十年忠長成命為龍江衛指揮使賜誥命與世襲十一年七月從征雪山松疊等州并勦西番大著戰績上奇之明年閏五月回京旌賜綵段表裏十三年三月

統領舍人官軍扈送

太宗皇帝之國回駐臨清操練十四年四月調隨總兵
徐太傅北征是月二十八日出古北口同前軍蕭都
督居前部攻太石岳俘獲人口數百牛羊五千復攻
羶帽山殺獲數百人五月二十五日旋師營于公主
山有旨調隨穎川侯操練尋回北平八月入朝賜
鈔錠十五年冬命統旗軍征雲南大理等處多所斬
獲十七年十一月隨南安侯征廣南攻葛伯東洞殺
賊數百十二月破矣泥甸山峇賊二百餘人就擒十
八年十月領官軍從平涼侯復征廣南攻立達峇生

禽火頭立達洎賊屬梟以示衆群蠻震讐是冬回衛
二十年春西平侯奏忠才能服夷控制邊境調署金
齒衛事守禦永平威望大著踰年召還二十三年以
疾卒賜葬濟公墓側無嗣弟二人曰浩曰景

武德壽州安豐人至正末江淮用兵以材畧應募為
義兵百戶累功至千戶慨然有志於功名而共事諸
將皆不足與成功從元帥張鑑渡江轉戰寧國太平
之地且三四年言於張鑑曰天生勇猛之姿堂堂雄
萬夫今日劔於東明日劔於西事勢可知矣不早擇
所依一旦與草木同朽腐豈不可惜哉張鑑善其言

乃以丙申三月相率歸 上九月從常遇春攻毗陵
將下從援徐達于牛塘明年三月復從攻毗陵克之
五月與張鑑攻下泰州六月攻高郵七月以功除千
戶十月從李文忠赴常遇春于池州戰尤力流矢中
右股拔去之血流至踵弗顧戊戌二月從取於潛昌
化三月乘勝克嚴州賚以銀碗由千戶為萬戶五月
苗楊左丞軍軍烏龍嶺德曰可襲取之願為先驅文
忠問曰曷知其可襲對曰乘高覘之見其軍勢首尾
一衛決部曲時徙舉不安又其聲囂以此知之文忠以
為然出擊覆其營十月移兵取蘭溪十二月 上至

金華其守將竄安慶以城降從入金華己亥正月分
兵克諸暨三月復從文忠擊紹興鼓勇爭先右臂傷
而戰自若文忠曰人人如武某何戰不捷哉賚米三
百石加銀碗後三年二月蔣英反金華殺胡大海賀
仁德反處州耿再成亦遇害浙東震動德以是月從
文忠定金華三月從張指揮進擊處州遇賀仁德軍
於劉山德馳當之戰手罵仁德曰爾初無容足之地
來歸我 國家命爾為元帥爾不思報效而行叛逆
若爾者天地所不容神人所共誅爾死在頃刻尚敢
逆戰耶仁德大怒揮戈刺德中右股德引刀斷其戈

追擊之大呼殺入諸軍繼之仁德敗走為背城之戰
德又歟以精銳突入其陣鏖戰仁德遂為其下所誅
處州平回守嚴州甲辰官制行改管軍百戶乙巳三
月為吳張士誠軍犯諸暨從文忠擊退之賚綵繒二
文忠遣從朱指揮援浦城所過若金剛橋無蓋洞諸
寨皆下丙午春江山之十四都民據山寨為亂從徐
元帥直抵其處群盜大驚德徐曉以禍福則相與羅
拜願貸死悉撫定之洪武元年正月復從文忠下建
州劍州汀州還師從林都督捕海寇昌國之蘭秀山
七月復從文忠南入閩悉定閩溪諸寨十一月陞管

軍千戶階武畧將軍二年移衢州三年 朝廷定功
行賞賜世襲 制書文綺三緇如之四年靖海侯吳
禎出行邊德赴靖海于平陽靖海察其可屬任而平
陽重鎮外控島夷命就鎮平陽十年加武毅將軍在
鎮八年卒將六十致事十四年冬 上選將統諸衛
軍征雲南以德宿將命與諸大將將兵偕行
黃敏洪武中為汀州衛指揮僉事屠賊謝在真寇武
平敏率軍勦捕賊驚走因追禽之又於武平築城分
軍守禦境內卒以無虞

姜豫定遠人歲甲午歸附從克和陽采石姑孰金陵

鎮江毘陵江右浙西以勇略稱洪武二年取鳳翔秦隴鞏昌慶陽戰績隨著授管軍百戶三年進西安衛千戶十二年西平朶甘及洮州等處陞河州右衛指揮僉事誥賜明威將軍十七年致事子俊襲二十年俊謫戍雲南二十五年復職調雲南右衛孫紘襲調湖廣荊州右衛曾孫勝襲正統六年征麓川有功陞本衛指揮同知

胡閏國初從王師取江南攻戰湖廣累樹勲績歷官襄陽衛鎮撫鄧愈鎮襄陽閏為部將戮力禦王保保開屯田省刑役遠近悅附洪武元年隨克南陽等處

繼下隨州破洪山老馬劉寨討蜀河莽張四年正月上既命傅友德伐蜀四月復勅鄧愈選襄陽衛指揮任亮等率師佐之慮襄陽城守無人復以手書諭愈曰鄧愈可將襄陽軍馬城池事務權委鎮撫胡閏管領用心守禦如是本衛指揮出征日交付指揮掌管其見委任如此

夏毅字仲毅國初隨征江南以戰勲著歲戊戌冬從太祖伐婺州取之上駐蹕是州以其地為浙東要郡必擇有文武才者鎮臨之於是毅為金華衛指揮領兵戍焉壬寅春苗軍反金華括蒼殺守將胡大海

取再成等衛州或謀翻城應之殺震懼設方畧討賊
會謀於太史劉基卒定其亂毅靜中而寬外備武備
慎賞罰興學勸士政令一新在鎮數十年訓練撫綏
恩威兼濟兵民咸賴之為時良將

倪旺廬州巢縣人歲戊戌歸附從胡平章征討有功
累陞千戶洪武八年進定遼中衛指揮僉事尋卒子
昶洪武中襲孫璘永樂八年再襲世承 恩誥

趙彬定遠人歲甲午二月從李三元帥集軍七月攻
滁州乙未六月扈蹕渡江克采石太平丙申二月拔
中丞水砦三月破陳也先營克南臺十二月圍常州

丁酉三月下之留守禦是年夏秋取寧國宣州江陰
及馬馱沙戊戌三月攻泰興橫橋八月復溧陽尋復

宜興十一月 上親征婺州彬備先驅己亥九月奪
衢州明年正月有杭州之攻調守龍江時常遇春總
兵閱其驍勇命為旗總辛丑八月擣江州十一月偽
吳兵寇長興從遇春援之寇敗去壬寅秋援安慶癸

卯五月擊廬州八月禁江之戰中矢傷左右臂而陳
友諒以死尋圍武昌甲辰二月武昌平回取廬州敗
樓兒張遂援安豐攻潁州乙巳五月克安陸襄陽等
郡十月克泰州海安壩明年夏選總武德衛馬軍旗

是冬取浙西丁未九月平姑蘇北伐中原克沂州益
都洪武元年三月取汴梁四月下河南府擢青州左
衛管軍百戶調北京守禦改永清左衛百戶授昭信
校尉二年正月用兵高州大寧錦川全寧上都五月
迤北取寧國刀傷左足三年春夏征雲南州大王川
及磨狷虹螺山以功授世襲四年秋征松高州敗驢
兒國公兵五年征沙漠七年二月攻興州等山砦潛
匿逋民搜捕殆盡七月攻惠川州五鳳山八年十一
月進濟州衛管軍副千戶階武畧將軍賜誥十一年
九月陞懷遠衛指揮僉事授明威將軍十四年元將

乃兒不花寇灰山從擊敗之俘其人畜又二年授流
官誥十八年正月有事絳橋訓練滿月二十年討金
山一迷河拘納哈出二十一年征捕魚兒海哈刺哈
等地敗詹同等軍追乃兒不花于北海子曲龍海收
獲漫散達忽都平章曲劉兒司徒等人馬帥以赴京
上嘉其功賜白金彩段寶鈔誥授世襲二十六年卒子
忠剛正有武譽務灌督營造出征督運餉皆有功曾
孫昂玄孫祥祥子潤俱襲原衛指揮僉事

劉文鳳陽定遠人元至正中海內鼎沸文當其時忠
憤慷慨志氣超卓才畧過人尤善騎射鄰境有寇禦

之輒勝歲甲午挺身內附遂充先鋒凡大軍所嚮必
効力前驅多著勞績兵帥異其能舉陞千戶復從征
伐勇氣奮發嘗深入敵陣傷其右臂而攻敵不已兵
帥復壯之舉為萬戶甲辰以兵伍多缺罷免乙巳復
用薦為管軍百戶丙午攻克高郵承制守禦洪武己
酉始給誥命實授昭信校尉管軍百戶調平陽守禦
辛亥陞授武略將軍平陽右衛鎮撫癸丑調太原右
衛復改鎮武衛加授武毅將軍既而因事左遷寧夏
衛所鎮撫益克自奮效力邊陲以功復授鎮海衛鎮
撫年老致事洪武末卒子長藻襲職尋卒次定襲承

樂庚寅調至京師訓練改府軍左衛鎮撫

裴誠定遠昌義鄉人父子戊壬辰年歸附以勇略事

太祖守濠州授管軍總管癸巳秋卒誠代父領兵馬乙
未守禦滁州襲授管軍總管丙申入南臺時開各總
管府遂充石城門管軍正總管守禦甲辰改設諸司
拜石城門管軍正千戶洪武二年大賚守禦功賜白
金文幣四年從韓國公鳳陽備城八年征山西禽四
大王又二年調洮州衛左所十四年以功陞西寧衛
指揮僉事二十年命守禦碾伯二十五年調甘州左
衛明年守禦雷州二十八年謫行伍尋還職三十年

致事子忠襲原衛指揮僉事孫謙永樂十年襲調建
陽衛曾孫昇玄孫綸天順成化間俱建陽衛僉事
譚濟長沙湘潭人少力學歲壬辰湖湘騷動濟集眾
捍鄉邑會元帥楊完者率其部東下濟遂與俱及完
者敗死濟乃歸上將胡大海於建安大海賜濟文綺
銀碗各二即日署為萬戶從王元帥攻下蘭溪金華
既已降遂與俱守諸暨乘間拔蕭山更佐王元帥戍
建安戰咸林步大捷又捷於金山橋更戍衢州從王
元帥攻下廣信而留戍偽漢陳友諒軍圍廣信從出
擊生得偽萬戶一人吏卒二人馬一遂從鄧愈征下

臨川進援南昌引兵救建昌凡三年而還戍金華其
年十月偽吳張士誠遣謝院判寇東陽義烏從戰東
江橋生禽偽萬戶一人居歲餘復從擊張士誠軍于
新城之龍潭生得偽萬戶一人轉南戰鉛山遂至浦
城敗賴元帥軍南峯寺下進破景江橋寨生得一將
四卒更從李文忠轉西戰桐廬富陽餘杭遂從下錢
唐而文忠選濟為鎮撫復從文忠南取建州劍州汀
州洪武元年從胡左丞東平昌國海寇後一年忠顯
校尉勅書下其夏從徐指揮北征至北平遂屬征
虜副將軍常遇春追也速丞相軍於大寧全寧錦州

遼河復從文忠赴大將軍徐達于慶陽由涿州過中山渡滹沱出并陘至太原而大將已舉慶陽於是別由代州踰鴈門援大同行至馬邑遇劉平章軍與戰虜千戶一人行未至大同四十里與大軍共敗孔興脫列伯二國公軍於懷仁追北十五里得元帥一人又追至東勝豐州黑河雲內乃還明年復從徐指揮出居庸夾擊雲州遂及蠻子太尉沙不丁平章軍戰駱駝山等處從攻上都得萬戶一人從攻應昌得院判一人因逐魯王軍黑松林至慶州古城還次高州從趙左丞往松利盡諭下諸屯堡還至金寧文忠遣

部送元之降臣及宦官之北平已而復從文忠追沙不丁餘丁至三不刺野馬川而回以深入賜文綺二北羊十班師詔下還金華計功行賞例賜濟文錦六帛六制書令子孫世襲戍金華三年為洪武七年調平陽會私鬻鹽者六百餘人出入瑞安之小村百丈殺三魁巡檢温州衛命濟領軍往捕悉擒送獄明年夏青田民葉保五謀反處州衛檄温州衛合軍捕之亦以命濟濟曰此小孽何足煩吾官軍取之以弓兵足矣即率梅頭東山高樓三魁洋望仙口六巡檢往會處州軍于楊山寨竟破之竄者七十餘人蹤跡

禽之然於民秋毫無擾平陽民楊伯存造偽鈔磬山
九年夏事覺濟直擣其地獲之伯存援數十人濟察
其為吏所嗾乃免誣禍十年冬換忠武校尉明年攝
衛鎮撫事無鉅細咸裁以至公無不心服者十四年
秋平陽十六都陳以仁亦以造偽鈔發覺濟縛以歸
其冬慶州寇吳達三等犯平陽西鄙官軍出討兩百
戶戰沒二三五父老詣繆千戶言曰賊勢如此宜集民
丁作聲勢今小民所敬愛無若譚鎮撫者可任也繆
將軍謂濟曰無惜一行濟至江南告其民曰事急矣
何不團結相保守咸扣頭曰惟鎮撫命於是其子弟
皆荷竹鎗木楸而前一晝夜六七千人分扼宜山梅
奧烏石嶺石塘賊聞風為却數日毛指揮軍乃至縣
西南不殘燬濟之力也已而延安侯統大軍駐縣境
慮寇窮逸入海去選濟沿海往來徼巡無使船得下
海士卒或散入鄉村害民得以軍法從事巡徼至下
林巡檢訴有游卒十七人宿民家盡縛其家人汚以
通賊要賂方肆行榜掠擁之去矣濟追及之縱民而
縛十七人者還其主帥曰尔卒為凶虐其自治之維
時從征者無不乘時擄人兒女惟濟弗忍云
劉人傑國初從王師取集慶南徐毗陵討石牌海寇

伐通州攻雙刀趙援龍江破同安九江戰武昌回按
廬州克荆衡襄陽秦州收馬邏港欽兵守禦興化敗
張士誠兵著威望繼下吳興平姑蘇皆預有功
陶良鳳陽縣人從克滁州扈 蹕渡江取集慶等處
進征南服北伐河洛關陝積有勲勞歷官秦州衛指
揮僉事以病卒子仁仲襲調登州衛洪武二十八年
勦平南丹調南丹衛二十九年坐遲屯種謫行伍三
十三年還職調寧海衛尋改義勇中衛三十五年調
萊州衛孫全曾孫保玄孫雄世襲萊州衛僉事

